



Jørgen Rosbach,
Inatsisartunut ilaasortaq, Demokraatit

27-03-2026
Suliap normua 2026 - 780
All. normua. 2356988574

§ 37 naapertorlugu apeqqummut nr. 2026-53-imut akissut

Postboks 1015
3900 Nuuk
Oq. (+299) 34 50 00
Fax (+299) 32 50 02
E-mail: govsec@nanoq.gl
www.naalakkersuisut.gl

Inatsisartut Suleriaasianni § 37, imm. 1 naapertorlugu digitalikkut saqqummiussivik bestyrelser.gl pillugu Naalakkersuisunut apeqqutit tulliuuttuni allassimasut saqqummiuppatit.

Apeqqutigineqartut tullinnguuttuni akineqarput.

Apeqqut 1. Siammarteriviup bestyrelser.gl matunissaanik aalajangerneq sumik tunngaveqarpa?

Akissut: Bestyrelser.gl-ip matuneqarnissaanut aalajangiineq saqqummiussiviup atorneqarnera tassungalu aningaasartuutaasut ataatsimut naliliiffigineranik tunngaveqarpoq. Saqqummiussivik piffissami sivitsortumi killilimmik atuisoqarsimavoq, aammalu teknikikkut ingerlasinnaassaguni annertuumik nutartertussanngorluni. Taamaammat ingerlatsinissamat isumaqatigiissutip 2025-p naanerani atorunnaarfissaa peqatigalugu saqqummiussivik matuneqartussatut nalilerneqarpoq.

Apeqqut 2. Matuneqarnissaanik aalajangernerup kingunerisaanik nunaqavissunik siulersuisunut

ilaasortassarsiornermik suliamut qanoq kinguneqarsimanersoq Naalakkersuisut qanoq

nalilerpaat?

Akissut: Bestyrelser.gl ilaatigut Namminersorlutik Oqartussat aktiaateqarluni ingerlatseqatigiiffiini siulersuisussatut piukkunnaatilinnut katersuuffittut takussutissiinermullu atortorissaarutitut atorneqarsimasoq Naalakkersuisut ilisimavaat. Matuneqarnerata kingunerisaanik atortorissaarut taanna taamatut iluseqartillugu piujunnaarpoq. Piukkunnaatillit kinaassuserlugit sulineq piffissaagallartumi

allaffissornikkut suleriaatsit pioreersut aammalu digitalikkut saqqummiussiviit attuumassutillit atorlugit ingerlanneqassaaq, ilaatigut LinkedIn piukkunnaatillit piginnaasaat misilittagaallu suussuserniarlugit naliliiffiginiarlugillu siamasissumik atorneqartarpoq. Aaqqiissutissamik allamik nassaartoqassappat nassaartoqarnissaata tungaannut saqqummiussiviit siuliini taaneqartut siulersuisutut piukkunnaatilinnik killilimmik takunnissinnaalersitsissasut Naalakkersuisut nalilerpaat.

Apeqqut 3. Nunaqavissunik piginnaasaqarluartunik siulersuisunut ilaasortassanik pissarsiornermut

ikorfartuutaasussamik Naalakkersuisut sunik aallartitsissallutik suliniuteqarpat?

Akissut: Apeqqummut 2-mut akissut takoqquneqarpoq.

Apeqqut 4: Naalakkersuisut qanaoq ilillutik siulersuisunut ilaasortaasinnaasut piginnaasaannik

misilittagaannillu malinnaajuarnissaq qulakkeerniarpaat?

Akissut: Siulersuisutut piukkunnaatillit piginnaasaat misilittagaallu suussuserniarlugit sulineq ulluinnarni Naalakkersuinikkut Ingerlatsinermi Immikkoortortaqarfimmi suliarineqartarpoq, immikkoortortaqarfik taanna Naalakkersuisut Siulittaasuata Naalakkersuisoqarfianut ilaavoq. Immikkoortortaqarfiup Namminersorlutik Oqartussat aktiaateqarluni ingerlatseqatigiiffiini siulittaasutut piukkunnaatilinnik kinaassusersineq naliliinerlu ingerlaavartumik suliarisarpai. Suliaq manna paasissutissanik toqqorsivinni nammineq pigineqartut atorlugit aammalu digitalikkut saqqummiussiviit attuumassutillit, tamatumani ilaatigut LinkedIn ilanngullugu, atorneqarnerisigut ingerlanneqartarpoq. Piukkunnaatillit kinaassusersinnaanissaannut naliliiffiginissaanullu aaqqiissugaasumik tunngaveqartoqartariaqartoq Naalakkersuisut eqqumaffigaat, aaqqiissutissamillu allamik nassaartoqassappat nassaartoqarnissaata tungaannut Naalakkersuinikkut Ingerlatsinermi Immikkoortortaqarfimmi allaffissornikkut sulineq peqatigalugu digitalikkut saqqummiussiviit atorneqarnerat ilaannakortumik takunnissinnaalersitsissasut Naalakkersuisut nalilerpaat. Namminersorlutik Oqartussat aktiaateqarluni ingerlatseqatigiiffiutaani siulersuisutut sulisinnaanissamut soqutiginnikkaanni Naalakkersuisut Siulittaasuata Naalakkersuisoqarfianut attaveqartoqarsinnaavoq.

Apeqqut 5: bestyrelser.gl taartitut nutaamik allaanerusumilluunniit pilersitsinissamik Naalakkersuisut sunik eqqarsaatersuuteqarpat?

Aaqqiissutissamik nutaamik imaluunniit bestyrelser.gl-imut assingusumik aaqqiissuteqartoqassanersoq Naalakkersuisut suli aalajangiingillat, siunissamili qaninnermi suliassaqarfimmi periarfissat qulaajarnissaat siunertarineqarpoq. Aaqqiissutissamut taamaattumut pisariaqartitsineq, teknikikkut aaqqiissuussinermilu

periarfissat kiisalu tassunga isumalluutitigut kingunissat ilaatigut qulaajaanermi ilaatinneqarumaarput.

Apeqquut 6: Naalakkersuisut oqaluuserisamut soqutiginaatilinnik allanik paasisutissiisinnaanerlutik?

Akissut: Naagga.

Inussiarnersumik inuulluaqqusillunga



Jens-Frederik Nielsen
Naalakkersuisut Siulittaasuat